



Sesida dals

21 d'october 2024

Communitgà ils

25 d'october 2024

Protocol nr.

831/2024

Incumbensa Horrer

concernent l'augment dal credit d'impegn general per finanziair infrastructuras
relevantas per il sistem

Resposta da la Regenza

En il rom da la revisiun totala da la Lescha per promover il svilup economic en il chantun Grischun (LSE; DG 932.100) ha il Cussegl grond approvà durant la sessiun d'avust 2015 la creaziun d'in credit d'impegn general (CIG) dad 80 milliuns francs cun reservas per promover il svilup economic.

Sin basa da l'art. 18 LSE po il chantun – sa basond sin strategias regiunalas per sviluppar l'economia locala – promover projects d'infrastructura, sch'els èn ubain impurtants per il sistem, ubain sch'els gidan a rinforzar il sistem dal turissem regional sco er la direcziun strategica da la destinaziun turistica (lit. a) e sch'els han in'attracziun d'impurtanza chantunala u correspundan ad in basegn da l'economia generala (lit. b). La lit. a è pia concepida per projects turistics, la lit. b è concepida per projects ordai-fer il turissem.

En il rom da la revisiun parziala da la LSE è vegnì midà l'art. 18 LSE durant la sessiun da zercladur 2020 en quel senn, che la limitaziun temporara dal CIG è vegnida prolungada da l'onn 2023 fin l'onn 2030. Plinavant ha il Cussegl grond reservà 35 milliuns francs per finanziair projects da las regions en il sector da l'extensiun da l'infrastructura a bindel ultralad (BUL).

Fin oz ha la Regenza dà garantias e tratg decisiuns preliminaras per totalmain 25 projects (trais da quels en il sector dal BUL). Actualmain sa preschenta il stadi dal CIG sco suonda (stadi: fin da settember 2024):

- Dals totalmain 45 milliuns francs per projects che vegnan permess sut il titel «Infrastructuras relevantas per il sistem» èn gia vegnids pajads fin ussa 25,3 milliuns francs. 15,1 milliuns francs èn vegnids garantids, dentant n'èn betg anc vegnids pajads pervia dal progress da las lavurs da construcziun. 4,5 milliuns francs èn plinavant vegnids empermess cun trair decisiuns preliminaras. Uschia èn anc 0,1 milliuns francs disponibels libramain (0,3 % da 45 milliuns francs).

- Da totalmain 35 milliuns francs per projects sut il titel «access a bindel ultralad» èn fin ussa vegnids garantids 7,7 milliuns francs che n'èn dentant anc betg vegnids pajads pervia dal progress da las lavurs da construcziun. Uschia èn disponibels libramain anc 27,3 milliuns francs (78 % da 35 milliuns francs). Actualmain lavuran quatter ulteriuras regiuns vi d'access a BUL. Cun dumondas respectivas ston ins far quint.

La promoziun da projects impurtants per l'economia regiunala tras contribuziuns à fonds perdu per rinforzar il sistem turistic è sa cumprovada durant ils ultims onns, perquai ch'il chantun ha pudì pajar contribuziuns substanzialas per finanziar quests projects. Ultra da quai èn er vegnids promovids tscherts projects innovativs cun in basegn da l'economia generala. En differentas regiuns dal chantun han uschia pudì vegnir dads impuls per il svilup dal turissem e da la regiun.

Sin basa da differentas dumondas da promoziun vesa la Regenza er per ils proxims onns in basegn da pudair promover ils projects d'infrastructura cun in'attracziun chantunala sut il titel «Infrastructuras relevantas per il sistem». L'augment immediat dal CIG «infrastructuras relevantas per il sistem» chaschunass expensas supplementaras. Quellas n'èn actualmain betg resguardadas en il preventiv 2025 resp. en il plan da finanzas 2026–2028. Per in credit supplementar respectiv cun in import da passa 10 milliuns francs dovri – sa basond sin l'art. 9 al. 2 da l'Ordinaziun da finanzas dal chantun Grischun (OFC; DG 710.110) – ina missiva separada al Cussegl grond. Il credit supplementar duai vegnir accompagnà d'in augment tuttina grond da la prefinanziaziun respectiva (reserva), analogamain al CIG da basa. Resguardond ils termins fixads ed il basegn da temp per elavurar ina missiva po vegnir prevista ina debatta en il Cussegl grond durant la segunda mesadad da l'onn 2025.

Sa basond sin questas explicaziuns propona la Regenza al Cussegl grond da midar questa incumbensa sco suonda: La Regenza vegn incumbensada da sutmetter al Cussegl grond per il proxim termin pussaivel ina missiva per augmentar tenor ils bassegns il CIG «infrastructuras relevantas per il sistem».



Il president:

Dr. Jon Domenic Parolini

En num da la Regenza

Il cancellier:

Daniel Spadin